

**Quaestio medica ... an legitimus quadragesimalis victus salubris? / [Claude François Grandclas].**

**Contributors**

Grandclas, C. F.  
Winslow, Jacques-Bénigne, 1669-1760.  
Université de Paris.

**Publication/Creation**

[Parisiis] : [Quillau], [1749]

**Persistent URL**

<https://wellcomecollection.org/works/q89gs2pz>


**License and attribution**

This work has been identified as being free of known restrictions under copyright law, including all related and neighbouring rights and is being made available under the Creative Commons, Public Domain Mark.

You can copy, modify, distribute and perform the work, even for commercial purposes, without asking permission.



Wellcome Collection  
183 Euston Road  
London NW1 2BE UK  
T +44 (0)20 7611 8722  
E [library@wellcomecollection.org](mailto:library@wellcomecollection.org)  
<https://wellcomecollection.org>



DEO OPTIMO MAX.  
UNI ET TRINO,  
VIRGINI DEI - PARÆ, ET S. LUCÆ  
Orthodoxorum Medicorum Patrono.

QUÆSTIO MEDICA,  
CARDINALITIIS DISPUTATIONIBUS  
manè discutienda, in Scholis Medicorum, die Jovis vigesimo-septimo  
mensis Martii, anno Domini M. DCC. XLIX.

P R A E S I D E

M. JACOBO-BENIGNO WINSLOW, Doctore  
Medico, Regiæ Scientiarum Academiæ Socio, Anatomes &  
Chirurgiæ in Horto Regio Professore, &c.

*An legitimus Quadragesimalis vietus salubris?*

I. (a)

**P**RIMI Philosophi rerum naturalium causas Diis tribuebant, dein quibusdam Spiritibus creatis, quorum alii extræ res naturales positi ipsis prospiciebant, alii intrâ ipsas agebant; indè Paganorum, Cabalistarum, Peripateticorum fabulæ. Neoterici alio modo in inquirenda veritate processerunt; Anatomes, Chymiae, Geometriae, Physicæ experimentalis auxilio diversas finxerunt hypotheses, quibus in functionibus naturalibus nihil ab anima immediate proficiunt, demonstrare conati sunt. Nec hi prioribus sapientiores, Corporibus nimium impertiunt. Homo ultimum est & peculiare Creationis opus. Non eodem tempore cum aliorum animalium genere factus est. Propria ipsis fuit servata Creatio. — Corpus & animam jungi nullus est qui inficias eat; nullus qui utrumque in se invicem quadam proportione operari difficulter credat. Hocce negato singularia hominis; sive in sanitate, sive in morbo, sive in quibusvis vitæ circumstânciis. Videatur Nota ad Calcem, §. I-V, seq.

A

cumstantiis intelligi vix possunt. In mixtis sunt quædam proprietates , quarum alia à distinctis qualitatibus aut à certo principio emanant , alia quæ ab adunatis istorum corporum qualitatibus oriuntur. Ita sunt in homine attributa , quorum alia à solâ animâ , alia à solo corpore , alia ab utroque surgunt. — . In statu fano , verbi gratiâ , Idiosyncrasia , temperamentum , ingenii indoles , functionum ordo , situs , duratio , cursus , determinatio , tempus ; in situ morbosomania , delirium , melancholia , malum hypochondriacum ; non sunt unius corporis , neque solius animæ , sed sunt utriusque effectus sive modificationes diversæ. — . Animæ functio cogitatio ; corporis actio motus ; . — . Distinguuntur quidem anima & corpus , sed nusquam per vitam separantur. Nihil fieri potest in anima , quod ad corpus plus minusve sensibiliter non extendatur ; & vicissim nihil fit in corpore quod postea mentem non afficiat. — . Materialis valetudo in Homine à corpore pendet , Formalis ab anima. Hujus tutela Religio est , illius conservatio Medicina nostra. — . Una Ecclesiæ Doctrina ; multiplex ac diversa ejusdem Disciplina. Doctrina respicit animam , Disciplina totum hominem. Eorum , quæ necessaria sunt , facilis est abusus ; circa Victum & Vestitum plerique hominum. **E R R O R E S.** Ad eos præcavendos aut emendandos — omnis Ecclesiæ Doctrina. Homo igitur sese totum Religioni debet. — . Ut homo totus circâ Deum applicetur sine ullo corporis & animæ detimento , — præstat Rerum non naturalium & externarum pia tractatio , quâ corpus iisdem frui tur commodis ac exercitatione.

## I I.

**M**I R A B I L I S est Cutis & Abdominis inter se conspiratio. Ubi hujus laxitas , ibi illius densitas , & vicissim. Utriusque consensus circâ ægros potissimum observatur. Nullus diuturnior in cute vel in abdomen detegitur affectus , nisi simul utrumque laboret , aut brevi aliquâ ægritudine laboraverit. — . Quantus aër , tantus cibus , id est , pro cutis ab ære pressione , ea in stomachum alimentorum , habitâ ratione speciei , apponenda quantitas : tenuior indè in regionibus calidis , crassior in frigidis alimonia. Aëris mutationes aliæ diurnæ , aliæ menstruæ ; graviores quæ singulis tempestatibus contingunt. Ex ipsis mutationibus æquilibria tentantur. Ne corpus animæ vim inferat , sancitæ fuerunt ab Ecclesia Ciborum mutationes. Omnia aëris mutationum saluberrima quæ verno contingit tempore. Præstantissima pariter , quæ per illam tempestatem Ecclesiæ mandato fit ciborum mutatio. Verni aëris elateri & mobilitati respondent alimonia Quadragesimalis tenuitas , raritas & varietas. Victor iste corporis æquilibrium servat , fibras nec deterit , nec debilitat. Ipsius (vittus) occasione æconomiae animalis intima resurgit vis , natura suas feliciter experitur crises , demum citrâ ullam in mente perturbationem Vere novo renovatur Homo. Naturale Jejunium est ea in vivendo temperantia , qua quis indigentia tempora non prævenit , cibos non quærit laudiores , non petit eosdem paratu accuratores , nullam alimenti , sive abjectioris , sive delicatioris æstuose desiderat speciem ; denique in quantitate sumenda mensuram servat. Illæ vivendi leges quotidie commendantur à Medicis ad morbos præcavendos , sanitatemque conservandam. Eadem ab Ecclesia sanciuntur , determinatâ alterius Cibi specie in dieta Quadragesimali,

## I I I.

**Q**UADRAGESIMALE Jejunium , etiam quale sit hodie , servat corporis æquilibrium. A pristino ab Apostolis tradito licet differat , utpote strictum minus , ejusdem efficaciam est. Securè indulget Ecclesia. Ampliatis viræ humanæ laboribus , autem almoniæ copiâ , nihil ab abstinentia detrahit. — Alma Societatis mater est. Ex ipsius præcepto datur Esca fide secura , ratione necessaria , visu aliundè pulchra gustuque delectabilis. Venit & ex omni parte commoda versus finem Hiems initiumque Veris. Hiems , parasita tempestas , frugibus vivit alienis , sive perennioribus , sive induratis igne , siccatisque sole , sive saccharo acetove conditis. Jejunantibus multiplex offertur cibus. Quicquid tunc abortit terra , mare & flumina produnt , quæcumque singit ars , humana servat providentia , præstò sunt ad vescendum. De omnibus ut Christiani comedant , præcipit Ecclesia , unâ exceptâ Carne , ( exceptisque ab eadem oriundis , ovis , lacticiniis , &c ). Tempore Quadragesimali Pisces , Legumina , Olera , Fructus — sola licet & tempestivè ministrantur. Accedente Vere , aëre calore suo & humiditate , tûm nativâ , tûm à frequentibus imbribus ortâ , eos in œconomia animali excitat motus , quibus tota conatur ad tonum recuperandum , succosque Hieme congestos exprimendos. Ut isti felices sint motus , præcaveri debet , ne quæ per annum fit ad vaia plenitudo , vires impetut corporis. Dat hæcce commodæ diæta ( victus ) Quadragesimalis. In ea duo sunt consideranda , Jejunium & Cibi præscripti species. — Jejunium est semper & ubique necessarium & possibile. Ab eo — præsertim diætæ Quadragesimalis vel præstantia , vel nocumentum. Supponit ferè factam in corpore accretionem , vult integra viscera , præcipue pulmones , quibus infensum , si sit in ipsis aliquæ labes. Jejunio nullus tenetur nisi elapso ætatis anno vigesimo - primo , quo tempore uniuscujusque jam nota valetudo est. Innotescit Jejunii virtus minus quamdiu adhibetur , quæcum eo finito , solitis assumptis cibis. Jejunio succi restui circulationis lege redduntur , rursusque nutritioni cedunt. Solida molis indigestæ aliquid amittunt , plurimum roboris & elasticitatis deinceps acceptura. Quæ sit in iis afflictio sive maceratio , est in dies crescens intimus fibrillarum contactus , quo anima molestam percipit sensationem , haud absimilem dolori , quam à nova earumdem extensione suscepit convalescens , ubi primùm sese exercuerit. Hæ impressiones in convalescente nutritione delentur ; illæ in jejunante peculiari suâ diætâ servantur ad tempus. Ne homo ipsis adventitiis assuescat molestiis , Ecclesiastica disciplina commestitionis horam indicavit , ciborumque speciem & quantitatem definitivit. » Idcirco enim Jejunium definitur maceratio seu afflictio carnis ex abstinentia ciborum , nempè talis abstinentia , ut per ipsam caro aliquod incommodum sentiat & affligatur. ( a ) Afflictio carnis quæ in jejunio ab Ecclesia affectatur , non tam ex qualitate ciborum provenit , quæcum ex demissione consuetæ cœnæ , ob quam corpus aliquæ inediâ maceratur. ( b ) Ecclesia etiam Horam certam comedens

( a ) Zucch. Quest. Med. leg. I. 5. q. 5. n. 4.

( b ) Ibid. q. 8. n. 30.

„ di præscripsit , nam si prævenire hanc Horam liceat , facilè etiam leve  
 „ illud famis prædictæ incommodum evitabimus , nullumque ex jejunio  
 „ laudabilem fructum percipiemos . ( c ) — Quantitas cibi vespere in  
 „ collatione , vel refectione , aut cœnula assumendi , ne jejunium fran-  
 „ gatur — sit ad modicum quid , quod uncias duas aut tres ad summum  
 „ non pertranseat . Sed verè — definiri ea quantitas , propter varietatem  
 „ subjectorum & conditiones ab extrâ evenientium , nullo modo potest .  
 „ Ut hæc tamen exquisitiūs decidantur , repetendum id quod dictum est ,  
 „ Quantitatem cibi assumendi non debere esse notatu dignam , unde &  
 „ Qualitatem talem esse oportet , ut quam minimum , vel nullo modo nu-  
 „ triat . Ergo inter omnes cibos minimi nutrimenti sunt herbæ & fructus  
 „ atque utraque profecto eò minus nutrire possunt , quæ simpliciora af-  
 „ sumuntur ; cocturâ enim & conditurâ aptiora ad nutritionem efficiuntur .  
 ( d ) “ Neque hæcce ( tunc necessaria ) perturbant . Dura licet , pietate  
 leviora fiunt , mentem circa Deum applicant , sensuum acumen operan-  
 tur , motus corporis compescunt .

## I V.

**A** NTEQUAM aliquis Quadragesimale Jejunium suscipiat , suam  
 ipsi licet inquirere valetudinem . Si patiatur , dubitare sapientis est ,  
 sed prohibita violare non præsumat nisi à Sacerdote permisum suscipiat . Me-  
 dicos etiam consulat ( sapientia & experientia doctos , religione & con-  
 sciencia probos ) . — Ut legitima detur à jejunio immunitas , decem sunt ob-  
 servanda : 1° . Temperies , 2° . Ætas , 3° . Conditio , 4° . Sexus , 5° . Cor-  
 poris habitus , 6° . Ingenii indoles , 7° . Consuetudo , 8° . Vitæ munus ,  
 9° . Incommoda præsentia , 10° . Mala quæ ex diæta ( Viætu ) Quadra-  
 gesimali possunt contingere . Quæ ex hisce depromuntur impedimenta ,  
 alia jejunium , alia ciborum speciem , alia quantitatem , alia omnimodam  
 abstinentiam respiciunt . Temperies sæpè accusatur tanquam impedimentum ;  
 ipsi ne nimis auscultet Medicus . — Prima & ultima Ætas excusant à  
 jejunio . — Ex senibus non immunes qui facillimè jejunium ferunt ; —  
 soli inter eos qui anili marcore conficiuntur , quibusque sit frequens ven-  
 triculi morsus . Conditio personarum neminem dispensat . Mulieribus gravi-  
 dis , puerperis , nutribus ( habito respectu ad periculum fætui vel laetenti  
 imminens ) prohibentur jejunium & abstinentia . Tenuior corporis habitus  
 est legitima dispensatio , saltem à jejunio . Ingenii indoles corporis tempe-  
 riei affinis . Huic nonnunquam condonandum . — Consuetudini , ubi præ-  
 texitur , nulla habenda ratio ; ipsi Medicina cedit , Religio numquam .  
 Efficaciūs homini prodest , licet inassueta suadens , pietas . Dubitante Mallaf-  
 fare , Daniel & ipsius socii bene conscië edulia Nabucodonosoris fastidiunt ,  
 aquâ pro potu , leguminibus pro cibo vescuntur , Post dies autem decem ap-  
 paruerunt vultus eorum meliores & corpulentiores . Sæpe & legitimè à jeju-  
 nio excusant vita munia . Non tam à Ciborum qualitate quam à quanti-  
 tate & tempore refectionis dispensant . Non à laborum specie , sed ab ef-  
 fectibus quos pariunt , desumenda excusationis causa . Morbus est causa .

( c ) Zacc . Quest . Med . leg . 5 . q . 1 . n . 32 .

( d ) Ibid . q . 9 . n . 16 . 17 . 20 . 21 .

sufficientissima & evidentissima homines à jejunio excusans. Debet esse gravis, totum corpus aut partem notabilem afficiens, ut admittatur tanquam legitimum impedimentum. Si sit confirmatus, ut cæcitas, non ab ulla jejunii conditione excusat. — *Immunitas occasione morborum concessa* est vel generalis, vel particularis. Scilicet alia carnem, alia ovorum usum tantummodo permittit, alia comeditionem multiplicat, alia refectionis horam mutat. *Timor rationabilis futuri mali* est justa causa excusationis. Timendi rationes desumuntur ex tenuitate corporis, cujuscumque visceris debilitate, ex morbis præteritis facilem recidivam facientibus. — Nullus (*egrotus*) gloriatur se invitis jejunasse Medicis. — Uni sano licitum est suam explorare naturam per hocce tempus. Experimentorum est opportuna tempestas. Quot tunc sumuntur cibi, tot observantur. Ex ipsorum impressionibus in unumquemque hominem diversis singularis prodit temperies. „ Discant tam Medici quām eorum consultores, non esse „ petendam absolutionem à jejunii obligatione illico atque læsum quis se „ senserit à jejunio, sed potius quærendum, an aliqua ratio jejunandi sit, „ quæ sit magis salubris quām præterita; discemus enim tunc, à qui- „ bus abstinere nos oportet. (a) „ — Sunt enim qui à particulari cibo noxas percipiunt, quo omisso servari potest commodissimè jejunium. Aliis nocet plurima comedio unicâ vice facta; si minus comedant, etiam si non coenent, absque noxa jejunium ferre poterunt. Aliis nocet ciborum varietas; simpliciori cibo sint contenti; nullo modo à jejunio lædentur. „ Videant ergo Medici, ac rigorosè insistentes examinent, an aliquid „ simile irrepere possit in his, qui jejunare obligati, ab ea obligatione „ se eximere student hujusmodi illegitimis excusationibus. (b) — Quæ- „ cumque dispensatio à quacumque conditione requirat particularem con- „ siderationem, ita ut teneamus in licentiis concedendis fidem facere, „ an cum licentia comedendi carnes intelligatur annexa licentia bis in „ die, aut pluries comedendi, aut horam jejunii præveniendi. — Ubi „ quis dispensatus sit ad carnes ob timorem tantum futuri morbi, non „ censendus ad aliquid ulterius dispensatus. — Quia unusquisque tenetur „ jejunare eo modo quo potest. — Nullus enim immunis esse debet in „ vigiliis & jeuniis & Quadragesimâ ab ea carnis maceratione, quam si- „ bi licet exercere absque evidenti sanitatis dispendio; ita ut si quis non „ possit à carnis abstinenre, quia pisces suæ naturæ contrarii sunt, ab- „ stineat saltem à multitudine refectionis, —; servet item horam jejunii „ ab Ecclesia determinatam, ut carnem eo modo, quo potest, affligat. „ — Quòd præcipue advertendum, ubi licentia Ovorum & Lacticiniorum „ tantum concedatur; tunc enim — non censeantur ab aliis jejunii obli- „ gationibus soluti, qui tales licentias obtinuerunt. (c) Dictum jam superiùs „ non semel est, Ecclesiam in impositione jejunii non intendere animæ „ vel corpori detrimentum inferre. Idcirco non modò non permittit je- „ junium infirmis, sed dissuadet. — Hoc fundamento posito, dico, Ec- „ clesiam — rectè etiam ab abstinentia potus & tolerantia fitis nos ab- „ solvere, quia ex fitis tolerantia, maximè si immodica sit, periculum im- „ mineat corporeæ salutis. — Nam facilius toleratur fames per tres dies;

(a.) *Zacch.* Ibid. q. 5. n. 6.

(b.) *Ibid.*

(c.) *Ibid.* q. 8. n. 6. 8. 9.

„quām sitis per tres horas. — . Ergo hanc sitis tolerandæ difficultatem „præ oculis habens Ecclesia , ad libitum bibere quandocumque permisit , eo solummodo contenta , ut mediocri & rationabili famis tolerantia gliscen tem carnem , quoad fieri potest , compescamus. — . Vini potum extra cibum & cum cibo in die Jejunii ab Ecclesia tolerari ; pri mò quidem propter consuetudinem , — quod cum nos ab incunabulis vino assuescamus — facile in jejunis sitim incurrimus , quam si aquæ potu exinguere velimus , ob desuetudinem in difficultia symptomata labi possemus. — . Secundò quia præcipua intentio potus est distributio alimenti solidi. — . Tertiò quia intentio potantis est levare sitim , quod ab Ecclesia — permisum. — . Ecclesiæ indulgentia se extendit tantum ad sitis extinctionem , — non enim intendit Ecclesia , ut vini potu famem repellamus , sed tantum ut sitim exinguamus ; at sitis vino optimè diluto extinguitur , fames autem meraciore vino superatur. — . Etiam si enim vinum nutriat , non ut alimentum , sed ut potus concessum est ( aquâ permixtum ) ad ciborum distributionem , & ad sitis extinctionem (d).

Præcedentes hæ quatuor Sectiones ex uberrimâ Clarissimi quondam Collegæ M. LUDOVICI DE SANTEUL , Dissertatione de Quæstione Cardinalitatâ in Scholis Medicorum discussâ , die 30 Martii 1733 , *An sana sanis diata Quadragesimalis?* excerptæ sunt , ipsis quidem verbis , mutato tamen ordine , paucisque non omnino ad mentem Auctoris intra hamos Parenthesew alieno charactere intermisisti ; quibusdam insuper ex Consultissimi D. P. ZACCHIA , *Quæstionum Medico Legalium insigni opere* , cui Dissertationis laudate D. DE SANTEUL , non exigua pars debetur , prolixius additis , geminâque ad marginem positâ virgularum serie distinctis.

## V.

**L**E GIT I M U M *Quadragesimalēm* viēlum abundè subministrant Pisces , Frumenta , Legumina , Olera , Fructus ; victuni partim cunctis sine discrimine , singulis partim cum delectu salubrem. Cæterū quid œconomia animali exinde generatim faveat , quidve speciatim , experientia non semel facta , sed aliquoties seorsum rite examinata docebit. Linguæ , palato , gula , totidem indulgentissimis receptaculi alimentarij janitoribus , minimè fidendum. Renuentibus iisdem , quicquid universi corporis tam conservandæ , quām resarcendæ sanitati revera convenit , fideliter assumendum. Condimenta ciborum , uti quovis tempore , ita verno præsertim , irritamenta gulæ. Victum quemvis genuinè salubrem , inīo saluberrimum atque optimum quemcunque , pessima corruptione inficiunt hodiernæ coquorum , cupediniorum , ac vinariorum artes , corpori funestæ , funestiores animæ , Religioni funestissimæ. Ita profecto . Depravatæ nimirum consuetudinis in dies gliscentis vitio , hodiernus quibusdam in locis per tempus Quadragesimale victus à pristino salubriter instituto ita degeneravit , ut quamplurima hinc enascentia valetudinis solitæ detimenta ansam dederint inculpatissimum culpandi victimum ; sub isto prætextu legalibus escis unctiores intermiscendi dapes , iisdem licentiis abrogatis lautas substituendi mensas , &c , quod magis dolendum , ipsam criminandi Ecclesiam Catholicam , in Oratione primi Quadragesimæ Sabbati *hoc solempne jejuniū animabus cor-*

(d) *Zacch. Ibid. quest. 6. p. 10. 22. 27. 28. 29.*

*poribusque curandis salubriter institutum esse præmonentem.* Verùm hujusmodi indoctorum hallucinationes , delicatorum & gulosorum prætextus , indulgentiorum & conniventium culpas , alienorumque criminaciones , notissima præstantissimorum Medicorum , tum nostratū cùm exterorum scripta & consulta satis superque redarguunt ; ( e ) apertè probando , corporibus vernâ præsertim tempestate talem omnino prodesse victum , qualem animabus atque ipsis curandis Ecclesia salubriter instituit ; non verò talem qualem coquinaria mollescentium , vacillantium , labantium ac degenerum ejusdem filiorum delectamenta sensim ac pedetentim deinceps alterârunt , atque alterando effecerunt insalubrem , conspirante simul perversâ non paucorum , vel scientiæ , vel conscientiæ , vel utriusque experitum , indulgentiâ . Cæterùm licentiores istos non ita pridem Sanctissimus omnium Fidelium PATER AC MODERATOR , BENEDICTUS XIV , gravi notavit censurâ , eosque laudatissimis simul diversorum optimæ notæ Medicorum monumentis quampluribus , erudiendo potius quam refutando , coarguit . ( Epist. Encycl. Romæ 1745 . ) „ Accedit etiam , inquit , „ quod Medici facilitate quâdam incredibili peculiares à Quadragesimæ „ præcepto liberos & immunes decernere soleant , de qua re gravissimè „ monendi sunt , ne suas animas indulgendo nimis aggravent . — Postre- „ mò si velint percurrere ea quæ in Italiâ & extra ipsam præclarissimi Au- „ tores Medici typis evulgarunt , facile deprehendent , abstinentiam ci- „ borumque parsimoniam ab illis magnopere commendari , discrimen in- „ ter morbos constitui , & certis rationibus ostendi in curandis quibusdam „ morbis nequaquam requiri , ut jesculum & carnes loco piscium , olei , „ aut herbarum substituantur ; in aliis verò juvare plurimum , si sublatis „ carnibus , cùm indicitur jejunium , oleo vel lacte ægrotantes utantur ; „ illud etiam compertum , delicatis quoque ac mollibus abstinentiam „ quadragesimalem nullam inferre perniciem , neque plures ob eam cau- „ fam inter ægrotos vel mortuos recenserit . „ Id ipsum unusquisque sui ip- semet curam gerens quadragesimali tempore , variis variorum esculento- rum tentaminibus , solo studio religiosè vivendi ac sanitatem religiosè con- servandi vel resaciendi , prudenter examinatis , luce clariùs demonstrabit . Exulent igitur à mente , à mensâ , & à culinâ quæcumque *legitimum verè-* „ *que salubriter institutum quadragesimalem viatum alterare poterunt , &* efficere insalubrem . Muriatici pisces , verbi gratiâ Salmones , Haleces , Moruæ sive Aselli maritimi , per dies aliquot aquâ simplici limpidâ pluries renovatâ macerentur ad sufficientem usque salis vetusti ac præ vetustate acerrii expulsionem , alioque postea cum sale coquantur . Recentes au- tem qualescumque , vel aquâ solâ cum aliquanto sale elixi , vel super pru- nas leviter tosti , posteaque oleo ac sale conspersi , saluberrimè nutrunt . Parili apparatu simplicissimo Legumina , Radices , Olera verè *salubrem Quadragesimalem viatum exhibebunt* , variè tamen pro singulari temperamen- torum , idiosyncrasiarum , consuetudinumque varietate variandum . Con- tinuo quamplurium annorum decursu Pisces , Fabis , Lentibus , secundùm hodiernam apud nos artem coquinariam , etiam vulgarem atque usitatis- simam , sollicitè præparatis , tormina , borborygmi , ructus , &c. quovis omnino tempore , quâvis cautione , & quam minimâ quantitate sumptis-

( e ) Vid. suprà §. II. finem.

alicui contigerant, qui posthac iisdem absque omni condimento elixis, & extra focum oleo saleque congruenter mixtis, impunè quolibet tempore & quantitate qualibet, imò tam salubri cum successu jam demum ultra tres vel quatuor annos vescitur, ut solis istis salubriter prandere se posse non dubitet. Idem ille trigesimo-primo ætatis anno *victum Quadragesimalem* nunquam expertus, eodem nihilominus anno tali cum salubritate quamvis ex acerbissimo nuperrimè morbo convalescens, & anteà sæpissimè valetudinarius, bisque feretro (a) proximus, *victum* eum sustinuit, ut deinceps per decem fere Iustra, exceptis ob inopinatum violentissimæ febris accessum, duabus ultimis unius *Quadragesimæ* diebus, saluberrimè continuaverit. Quinimo, quæ ultra viginti annos singulis circiter hebdomadibus ipsum molestaverat, hemicrania, quadragesimali priorum aliquot annorum tempore cessaverit, solitis postea per reliquam eorumdem annorum partem recidiva periodis. Eâdem verò experientiâ eodem cum successu salutari repetitâ sæpius edoctus, similiter per majorem plurium deinceps annorum partem absque carnibus carniumque jusculis cœnando, inveteratæ istius hemicrania prorsus & perpetuō immunis vivit, anni ætatis suæ octuagesimi mense ultimo; gratâ semper memoriâ recolens *Vigilantissimi* quondam Decani D. VERNAGE Patris effatum: *Inculpatiū vivunt, qui hoc tempore abstinentia animabus corporibusque curandis salubriter instituta, & carnes à mensa, & pisces à cœna avertunt, frugibus & oleribus contenti.* (b) Omnibus hisce seriò ac religiosè perpendenti cuilibet evidentissimè constabit, *Quadragesimalem victum* prava consuetudine, indulgentia licentiore, ac delinquentium multitudine pravitatem delicti simul obtegente, alteratum & demutatum omnino insalubrem esse; genuinum verò atque legitimum solum esse corporibus animabusque curandis verè salubriter institutum.

(a) Quæst. Quodl. de Signis incertæ mortis 1740.

(b) Quæst. Cardinal. anni 1703, *An Cerealia & Olera agri Parisiensis salubria?* Præside M. PERREAU, cuius vices gesit ipsem D. VERNAGE, Decanus & Theseos Autor, præsente in Scholis nostris Illustrissimo ECCLESIAE PRINCIPE JACOBObENIGNO BOSSUET, EPISCOPO MELDENSI, cui illam dedicaverat Baccalaureus proponens J. B. W. Danus Othoniensis.

*Ergò legitimus Quadragesimalis victus salubris.*

Proponebat Parisiis CLAUDIO-FRANCISCUS GRANDCLAS, Pontimussanus, Doctor Medicus Pontimussanus, necnon Saluberrimæ Facultatis Medicinæ Parisiensis Baccalaureus, A. R. S. H. 1749, à sextâ ad meridiem.